

雪

翁

詩

集

雪翁詩集卷二 五言古

明慈谿魏 畊白衣撰

同吳五邦瑋及其令阮卿禎懿禎游王右軍所題

驚峰寺

崖有老梅
晉時植

石橋散行藥高柳白鷺翔風送木客吟始見驚嶺陽霜
橘垂秋金鹽水鳴琳琅寒林煙剎出舊題開陰廊緬懷
蘭亭客永日憩竹房緣崖探昔梅預想青春芳深公待
茶椀三笑虎谿長

南谿還遲朗軒讀蔡五十一仲光詩集因寄蕭然

隱居

魚鳴綠萍響青青蘭葉渡遙聞黃鳥啼芊芊隔煙樹倒
載筇簪歸垞口日云暮五柳掃徑幽兩兒供孺慕坐敞
遲朗軒讀我中郎句此事十載還風流見豪素蕭條北
幹園因憶始相遇頻年客洞庭不獲元歎願待月吐芳
洲閒居聊自賦

酬元庵長老謝爛柯江石之作

稽首皈大鑒贈之五色石蕭然玉局風應笑雲門客憶
我游爛柯秋空映寒碧江水清且瀾飛鳴朝復夕青山

望不歸翫弄沙洲側今茲竹窗間磔碗承瑤席焚香雙
鶴步窺巖落花積倘君時見思谿流長可滌

陪兀庵和尚上虎巖禮塔憩宜晚亭覩銀海有述
偶與雲霞親穿林迎旭日春風復關情令我見珠闕珠
闕渺何許二漾迴如一龍圖寶鏡開金波瑤池出髣髴
下湘君風雨聞靈瑟飄飄天響來蕭蕭松籟逸灑掃浮
圖還傍窺洞門畢明發同馬首恂恂恨猶失

雜詩

道逢扶桑君雲車下冉冉貽之青藍花贈我玉橄欖相

攜過南園靈光不能掩夜坐明月軒金池發菡萏官奴
抱琴來朱絃映竹簾彈成太古音其味一何淡矯矯西
山鶴飛鳴動遐感

戊戌除歲高齋迴矚有懷玉林大師

嶽歸倦游旅海還釋行查值茲歲又除荒隅集幽遐冰
池響連壁風枝漾日華眺聽出高齋蒼苔綦屨斜遙見
碧山岑驚鴻帶晚霞綠蟻方持滿蘭肴薦已賒飲光渺
何在積念增紛葩亮未緇素衣豈復慕京華坐憶高人
踪無由寄折麻秉燭愁至曙鳴梢去城鴉

憶別

櫻梅啼黃鳥蘭若搖芳洲
踟躕上陽日思君千里游
萋萋欲碧曖曖露已秋
是非感恨情安知送餘憂
早聞君闈婦三五月滿樓
彈箏惜指寒滅燭窺螢流
愛而望不見飛鴻憶邊州
邊州若可到爲君寫悠悠
悠悠鳴塞馬萬里黃雲愁

答祁六班孫聞予留滯蕭然以詩寄怨之作

田田蓮葉暮嫋嫋涼風生
白露尙未晞鴻雁江州鳴
抱琴北幹園挾彈文通城
桂楫不可渡寸心愁已盈
寸心

愁奈何銜杯不解醒
羈客懷宿莽公子怨杜衡
由來慕佳期文翰相流并
結言幸有藉滄洲終協情
窮海勛所蹈秦望可以銘

答祁六見憶

江花澹容與望望衡門開
霧洗林彩妍雪罷巖光迴
春風復何豫令君多所懷
未果遼東諾應有山陽哀
禽囀竹素莊睨睨在櫻梅
鶴銜雲錦字彷彿下琴臺
苦乏伯牙調徒拂陳公杯
風延入簾早月照離宵幃
雖無滯歡術終言託徘徊

五磊寺藏經閣讀華嚴呈拙長老

五磊海上山嵐彩不可名我來十月交長老袞袞迎揮
塵坐竹窗啜茗笑松楸雪霽島樹見日出天雞鳴幸無
虛塵染故已浮榮輕納履不能去高枕宵夢清食晡方
頽盥息游偃化城旣覽天親論復讀華嚴經超超諸心
賞豈必悟無生常希苾芻趣玩此智寶誠邱園諒可託
吾欲濯吾纓

南湖贈俞汝言

雲散落帆亭酌我鴛湖月詎知山中人依然對瑤闕摘

匏迴仙查洗練飛秋雪浩流千丈上誰家園林出微微
磬遠聞瀏瀏風不絕因懷桐柏宮更憶鑪峰碣瀑布霜
流虹莓苔宵映日別後尙相思待君煙蘿窟猶有許斧
芝入巖尙可掇

鶯脰湖寄朱茂朋

曾聞章句美常憶弄珠樓竹林五載別白雲多所愁春
雨桃花發湖波日夜流飄飄吳楚客安能辨沈浮月出
洞庭山浦口繫我舟潏鷺忽爭喧沙鷁飛相求徒然開
幔坐獨酌思悠悠曉渡青楊岸挂帆風颼颼回看懷君

處蘭杜已盈洲

贈聞初長老

長老竺法徒身世棄何早昔有峨眉游今愛茗溪好構
室伏虎巖語默寂爲道無心若春風歡喜常開抱因掃
松下雪遂趺澗邊草對嶺送白雲接翼看歸鳥居士四
明來相從輒傾倒早晚聞山磬休憩蔭蘿薦

新治思溪舍南小隱卽事和錢价人作

羈客越鄉愁邱樊多所曠迴船青谿口見君有此宅石
路駢紆徐蘭橈敞弘赫竹樹澄湖陰雲霞浮嶺色我常

下君榻晞髮謀閒適
疇坐南軒南今臥北窗北
噦噦晷聒晨團團苔生夕
怡神風中琴游衍彌自得
種瓜願所希烹鼎恨何極
幸從潁水游秉筆參圖籍
遐哉樂志論仲統垂嘉則

歸甬東寄蔣苑

四明巉巖直羅剎江流深
城池若連壁南望星河臨
川隰同炎嶺停雲常晝陰
子滯青峴曲我作還山吟
彷彿閩邱阻燕賞不可尋
向夕攜從弟拂衣送遙岑
明然遠峰雪目接歸鴻林
隔溪雞鳴寺徒聞鐘磬音
掩蘿燈耿

耿離思夢沈沈空梁海月來孤坐彈瑤琴

春日柳園憶羣從作

余早歲婚於茗上遇時多艱到四明者廿載閒纔三
四往而已戊戌秋送嬭還鄉置酒會高曾下羣季得
四十餘人依坐班齒余乃蓑然爲首自顧己容白髮
蒼蒼把杯敘懽慨亦至焉余常游雞鳴湖越謝嶺愛
李家竹園十餘里豐壩坡松篁蔥蒨谿澗縈迴謂可
以構室娛老與昆弟輩逍遙賦詩今輾轉以來遂成
虛願軫念同氣聚處何期上春芳菲羈旅滋愁聊書

短篇寄之亦俾羣從知我意爾

陽回冰池泮茗南春早歸雙燕舞風簾園柳搖芳菲羈
人有何愁愁此人事非森森愛連理脊令思依依日夜
滄海郡月落桐江磯渺然煙波闊如雲車蓋稀坐閣聽
猿嘯移艇惜花飛安得踐首邱言采故山薇

鴛鴦湖別孫處士治

芳洲榮蘭芷可以寫我心行行欲採贈忽下翻飛禽皎
然若霜雪交交送好音曠懷將千里尊酒敘在今在今
亦靡留歡少別恨深游期約五嶽名德砥南金笑言未

及終桂檝度前林
帆開天目遠
鼙嘯桐渚臨
飄搖去程闊
蕭條離岸陰
惆悵還城邑
雲色空沈沈

寒夜怨

渠椀惜青春
停雲思往昔
未遂石梁期
且臥東山夕
玉礪流清音
松風起寒色
誰知關塞游
能傷獨居客

緒冬自四明將返吳興舊時江路阻於戎艦乃由餘姚馬嘴山間道抵夏駕湖飯訖渡百官至東關是日風氣清恬每見巖壑彌亘彩翠重沓卽次雖艱僮僕忘勞有可記者

飄飄返五湖江路適無寬
旣闕籃輦昇復鮮鞍馬歡
隨僕豈自由緣谿沂林湍
沂未已峻嶒霞上看雪色
映虹霓雲光爍洄瀾詎如
流浪來所經肆遐觀始寧
聞殊勝石門可游盤歸鳥
聯翩去月吐遙岑端何時
尋謝公相將挂我冠

渡曹娥江

析析蕙葉彫黯黯渚雲漫
未倦旅游者安知江水寒
風餐辭遠嶼野宿出近關
鴻雁白沙集城闕人未還
故鄉杳沈沈去國淚仍潛
離岸就孤篷回首傷暮山
鑽燧然

楚竹逗月迷蘆灣誰復沂剡溪聞笙桐柏間

秋杪同馮愷愈宗異宗儀諸兄弟游慈谿北郊登
慈湖講堂待張鴻遵不至作

北郊秀山色刻畫連霞城講堂在其下湖水映分明青
蔥寒玉樹密柯交前楹狂客違鄉久今來始從行道德
諧夙慕雲澤慰素誠開屐夕陽晚丹桂采欲盈佳人不
可見談笑空縱橫辭歸候蘿月蟋蟀林間鳴

夜泊永嘉江聞柏雲在華頂欲往從之先寄以詩
三秋華頂雪千丈石橋松上人結茅宇巖壑生清風夜

夜禪定起嘯月東海東野客纜孤艇淼漫江水中裊裊
叫嶺猿肅肅流雲鴻蕭條雜灘響蕩漾塵襟空他日相
從憩定識襄陽翁

金車山報恩寺解參聞去西二十里銅井最幽欲
偕禪侶尋游以臥疾不得往作

岑寂觀此心欲得無生訣破春三月來煩惱頓捨滅琴
硯汗竹粉衣巾酒溜雪趺坐石牀寒冥度韶華節誰知
鳥換聲落花澗流出遙聞銅井佳白雲堪翫悅松臥駭
龍鱗潭迴貯水月旦日東溪上偶與緇流說何時散行

藥獨往願仍畢

息賢渡

渡口臨絕壁四望玉山岑
羃歷映女蘿搖曳青松林中
有陶潛宅五柳春風深
竹樓誦素書菌閣弄瑤琴
俯仰天地間悠悠得此心
遙岸杏花落晴川谷鶯吟
清歌扣舷去漁父知我音
開尊湛芳月歸來露霑襟

春夜竹素莊憶陳六郎字

懷君山陰夜惆悵若峴東
卻憶千松院秉燭幽篁中
鶯啼花露溼起來聞曙鐘

錢山濠作

曾言出郭游汎汎錢山濠千峰濯翠屏卻疑洞湖上菱
葉浮新鮮鷺鷥時飄颺晚炊起竹煙漁艇聞蘆唱我懷
無懷前爲心澹已忘堪笑洗耳翁臨流猶參養

杪秋武林胡處士介從玉林和尚結剎金輪峰下
余以他故不遑踐諾介作書相招裁詩酬去時
在干松禪院

霽霞澹不盈佳興前嶺浮我在萬山中愛上松風樓飛
來太湖色灑落洞庭秋蔽虧藏仙洞縱橫見橘洲夕嵐

忽然起矯翼有鳴鷗長嘯懷故人撫景感時道如何招
隱篇蒼蒼下林邱桂枝參差發白雲偃蹇留願言暮春
期還從維摩游

度雞鳴湖憩李家竹園作

偶然涉江還愛此數里竹襍褊俯潭幽嫋嫋迴磴曲檀
欒有佳意蔥蒨積寒玉豈必棲白雲應是留芳躅樵蘇
客晚歸邀我茅簷宿從容謁兒子雞黍話棋局枕上聞
清猿牀下臥閒鹿醉識桃源人欣對不須熟若肯餌丹
砂相從願亦足

送客

湘江多芳草洞庭起微波送君清秋日奈此白露何去
去辭鄉縣悠悠隔山坡游宦楚天外雙鬢當蹉跎上官
手板迎郵吏折腰過鄙夫有所獻無忘黃髮皤簡靜撫
浮人澹泊偃階柯他日倘迴駕聞風候鳴珂

送呂八師濂

賢生丞相家蹠躩負才華筑中常置鉛魚腹隱鎮鄒報
鸞輕鴻羽結客徧海涯陸沈無所屬高義難自剖忽有
薊門行還醉離亭酒天寒渡黃河日暮臨汶口秋砧落

哀雁邊馬倏回首送歸指白雲遙岸楓紛紛惆悵雞鳴
曲蹴舞不可聞計程赴燕臺試憶望諸君

送魏家浦故里作

故鄉入我懷胡爲久留滯少小攀姻婭蒼雪中宵濟竭
來浮舟還乃在戊戌歲上堂拜耆老執手寧昆弟契闊
敘故懽事事悉如記迅翮矯夕嵐殘雨捲虹霓徘徊矚
雲物山川猶夙契首邱思曩哲祖德遺芳惠義風安可
忘流宕使終替何日歸田園夢想愜所詣

宿凌處士凱濠上別業

素襟好沈冥夢想濠上墟幾載淹城邑未始憩君廬風
霜念徒積山川看已疏今茲適見邀春日麗有餘桃李
映遠村水澤滿新畬徘徊候明月澄輝躍鯉魚寒春起
深巷鳴雞憶讀書興居晨夕間依依忘歸與白髮真已
得良醞未可虛我懷偶然遂妻子復何如

飲酒八首

冉耕歌芣苢錢鏗榮大椿修短各有期孰爲來者嘆結
茅南岡下散髮養天真麥隴起雉媒樵唱響夕榛斂襟
賦我詩游想絕埃塵春風日夕佳山川日夕新歡來酌

美酒願言邀故人

又

念我沖齡日慨想葛天時大鈞忽然傾不謂我罹之獨
策還廬山林泉久見披資糧罄竭盡褴褛及老妻曠懷
父母生落地爲男兒豈不榮軒冕縱浪古所嗤年來得
失泯已與自然期悠悠復悠悠愛此春遲遲何人期白
雲招之安所辭

又

草廬山澗曲皤皤一窮老門外町疃場種桑復種棗棗

花何纂纂桑枝更嫋嫋
溽暑散清陰
飈迴入襟抱
臥起田園閒
量腹授一飽
一飽便已豐
那用營昏曉
有兒豈必佳
憐其方穉小
當其歡喜時
長在膝前繞
誰謂非至樂
廣營恣煩惱
從容齊物論
沈冥衛生道
寄言世上人
無過杯酒好

又

嚴冬沍寒冰
陽春見和暎
氣象縱橫舒
麗日正皞皞
西山聳樓簷
游目皆甚好
含桃出林榮
雨過色窈窕
雖無松柏姿
亦自殊眾草
銜觴澹素襟
同調有野老
瓦甌可

以傾何必貴瑪瑙於此不解憂栖遲終枯槁

又

栖栖營園林芳樹森森植於中我偃仰他人從所適借
問何爲然彼此均爲客朝雨洗青巖海鷗下白石月來
滿東軒百年逢佳夕絲桐有妙聲宣其凝滯極陶陶詠
天籟詎須悲失職

又

塵俗競喧譁逐物如奔轍名山不肯游擾擾在城闕所
以箕潁流一生抱苦節至心愛松柏耽玩靡時歇伊余

衡門下西岑遙聳列竹徑搖明玕掩映悉超越況有好
鳥鳴關關未曾絕寂寞養頽齡春秋汎瑤瑟嘯傲終其
軀誰謂無所悅

又

去者如湍逝來者如電驚皓首道無聞念之雙涕零山
間夕飈急灌木寒蟬鳴夜長無緼被何以慰我情潏潏
溪上月流光入疏櫺披衣彈華瑟鏗爾庶可聽

又

南山何崔嵬拂衣竟不還非能勵高節世網使之然望

望孤霞飛止止青林邊代燭有荆薪漱齒有寒泉恬澹
日月積不覺閱華顛此意無人知慷慨還自言

柬贈柴紹炳

懷子美才彥亦復非一時直以世途阻披論未相持偶
有天台游曾宿浙之湄華軒承倒屣曲檻窺清池落花
琴硯藉叩竹鳩鵲飛歡言酌春酒意得遂賦詩了無適
俗韻諧笑發天機秋冬霜雪漫風氣山林悲別來一何
久節序頻遷移耦耕湖陂隔銜書鶴隴違唯有歲寒心
江海以爲期

寄題潘陸北固山下隱居

伊昔慕游俠會遭時運傾劍術避席引探丸虛左迎流
浪別鄉里因之下金陵大江嶧嵒來噴雪與天平沙鷁
飛將暮田鵠差池鳴晶晶湛秋月耿耿低玉繩迴艫維
彩纜中流見翠屏揭來感驟驥晞髮耽黃庭聞君住此
麓養真丹已成倘能煮白石還擬宿茅亭

寄葉雷生

茗上多佳山栖隱靡歲時今春和澤周草木發新姿遙
遙叩樵去安知我所之桃花無近遙鷺雉林中飛日暮

投荒谷野老不吾疑委運祛煩惱斯理將在茲聞君有
同懷承言寄此詩

己亥歲移居南陽竹素莊作

有序

昨歲故人朱士稚客游白下愛燕子磯前小洲抱江
如月幽篁叢匝欲與余築精舍數間退老其上題曰
江村細竹庵迴鑪雪川屢爲言之余僅笑而諾焉今
春余卜居思溪之南陽曰竹素莊者遂有終焉之意
因憶杜老浣花非有力代營勢所不辦而袞袞一角
隨地或可偶乞也誌之以詩旣用廣朱亦以自慰爾

舉世尙營營達者貴樂生古人居樹下茅茨亦已榮冰
泮春氣融風暄榆柳萌東臯盡耒耜我畚墾且耕人歸
林犬吠日晡村雞鳴我還攜兒子把書不簪纓傲遲
朗軒待君倒屣迎開荒澹素襟虛室養頽齡斂性就幽
逸淳悶返無名庶幾自然極栖遲任流行

贈周筠

寢跡市廛裏顧盼知者誰經營簞瓢足偃仰有所歸曰
余訪然明星火西流時望望田稼登淅淅霜草衰試聽
一言善清醕前相持邈然兔置風能詠漆沮詩披襟與

之諧通識可解頤懷哉返園林相思當在茲

竹素莊閒居作

貧賤可肆志富貴如浮雲悠悠紫芝詠慨然懷斯人
襟歡未耜柴門閉荆榛膏雨湛華木冷風鳴幽筠雖乏
南山駕西嶺眺轉新朱絃有時發白鶴下斜曛當年皋
隴上長嘯華陽巾擁褐將已矣屢空非所論

憶別梅里祁六班孫諸昆季并示朱四角調

人生化當返清暘逝隙塵因之愛親友惻惻春宵晨去
歲上剡縣枉路過君門吟諷遂情性得與諸子親牀下

履互著檻前荷共薰悵然離逖來忽已及仲春漪漪震
澤瀾鱗鱗并嶺雲搖月徒有夢懷風渺無因高齋事藥
曰疴起步松筠雙燕迎我飛聊側九華巾

蓮花莊與朱士曾

髯叟嵩少還常吟洛下詩偶過子昂宅愛其洗硯池池
水遙天碧楊葉四面垂風來滿院涼揮毫書所奇一行
青鳥下兩行鴻鵠飛何因寄王母遙與東瀛期邱饒
玉酒招手未爲遲

哭吳理禎

有序

理禎字治文金吾期生先生之長子也幼耽詩賦文
思煥發與其從兄雲章齊名雲章嘗對我有惠連之
目今年暮春越州文讌赴者三百餘人而余爲之客
時治文亦在座人初未之言余顧其雋爽一見識之
遂與定交過其郡中精舍相與沈飲半閱月乃去及
秋余復至將踐五泄之游而治文病矣偕雲章訪於
榻前猶危坐吟詩如無病時而形神困竭余竊私憂
之而治文竟死聞其臨屬纊對家人無所分囑而祇
稱余不去口氣息絕而後已嗚呼亦堪哭也矣

翳翳惜摧蘭惻惻感絕絃騰化悲迅驥古來有共然嗟
余於故人沈痛亦何言憶昔執君手君驚我衰顏豈謂
先我傾在生稱天焉相送歸墳隴駟馬鳴不前風慘秦
嶺高霜落鏡湖寒夕來還虛館素月流前軒莎雞扶井
吟墜葉飛翩躑沉聞孺子泣攪腸不成眠撫襟增餘慨
縱飲懷當年焉能餞青梅歡笑對几筵揚舲洞庭去徒
使情繚繚

雪翁詩集卷四 七言古

明慈谿魏 畊白衣撰

天馬行

吾聞毅皇甲申歲土魯火飾貢西馬雄姿矯矯開長道
遠來已刷幽并野香羅帕覆起蕭梢寶鞍照地九尺高
絕代眞龍入天廐磊落得意稱英豪憶昔初生瀚海年
青龍降精雲霧連蹴踏憑陵駕霜雪髣髴欲匝崑崙巔
今日馬鞭秋金鑄絡髮飛控太僕寺億萬驂騮盡側腦
拳毛師子非其類麒麟殿前天笑新柘黃袍子動聖人

欲騎此馬殺盜賊恨無垂綸出渭濱逡巡李闖破京都
大官叩頭小官趨鼎湖仙去玉座陷倉卒不得同馳驅
禍亂反覆真難詳橐駝滿眼苜蓿長鳳臆龍鬚苦不見
蒼梧萬里恨渺茫安得丹青寫其像騷裊礧礧見奇狀
風雲蕭瑟激悲壯

戲題施孝廉畫山水圖歌

湖州畫山水近推施之圻公車不上常遊戲雖然不比
叔明與松雪秃筆橫掃殊有致淋漓磅礴生長風無有
一筆與人同當其得意時悄然超天工兩峰劈破華岳

懸洪崖掌跡何歷然黃河西流白日動青柯北折紫塞
連恍惚秦漢封禪道中藏玉簡金泥篇坡陀更有長松
樹偃蹇倒挂層樓翠高枝礙青天低枝塌大地漠漠陰
飈六月寒森森遠島秋毫利男兒貴適真胡爲落風塵
殘年憔悴戎馬際旅食慘淡江南春吾觀此圖只咫尺
居然萬里橫金壁安能乘風望三山攜妻挈子附海舶
吾語施之圻吾有甬東細絹如雪白勞公細寫玄圃圖
扶桑洞庭成宿昔無使九州之外相斷隔

湖州行

君不見湖州直在太湖東香楓成林橘青蔥山川迢迢
麗村渚秋城澹澹遮蒼穹亭皋百里少荒土風俗清樸
勤桑農充腸非獨多薯蕷宴客兼有錦鯉紅白屋朱邸
互原野黔首擊壤歌年豐今歲野夫四十一追憶往日
眞如夢腐儒營斗粟閭閻挽長弓盜賊如麻亂捉人流
血誰辨西與東又聞大戶貪官爵賄賂漸欲到三公豪
僕強奴塞路隅獠豺狼日縱橫皇天無眼見不及細
民愁困何時終安得聖人調玉燭再似隆慶萬曆中天
下蚩蚩安衽席萬國來朝大明宮

公莫舞行贈顧有孝

君不見項莊拔劍五步內頃刻崩城壓戶牖拂巾橫遮
公莫舞玳瑁筵中碎玉斗公莫舞碎玉斗帝王有天命
憑陵亦何有寥闊千年來吾與汝曹在塵埃日向塵頭
糴升米布袍垢膩顏如灰遭逢濁世取埒塲數憶往事
增徘徊疏狂常得世人罵顛倒屢使塵眼猜詩書禮樂
何齷齪束縛難教笑口開石田茅屋好歸來決明燦爛
秋霞堆瓮有新醪飲百杯醉眠不聽林猿哀

贈潘四古琳

憶昨與汝菱湖東少年得意走春風刺船解水郢客同
杙篙擊楫鼉眼紅廿年不見汝髮白我還齒落左耳聾
佯狂避世無人識病驥老馬窮途側囊空金錯衣食少
妻孥啾唧啼四壁喜汝山田屢督耕夏收蠶絲秋穀成
莧羹飽飯日酬酢瓦盆注酒彈鳴箏況有兩兒天上送
五色鳳毛真聰明見我知我伯父行問我遠游來何方
更深持燭照我旁寒霜夜落鳴枯桑錦衾爛漫不成睡
起看天地何茫茫

醉歌行

姜大行筵中作

明州布衣家已傾幾歲亡命乞餘生襤褸百結腳不襪
伶仃枯槁無人形奔走東吳與西楚滿城盡是商與賈
各自全軀保妻子搥胸何處訴愁苦今年飄泊長洲來
性命如絲更可哀一餐飽飯襟懷好輸心寫意傾深杯
秋雨注牆螻蛄叫菊花倒地金錢開三盞兩盞筋骨活
將醉未醉春姿迴歡樂填填徹曉夜何知醫繳徧塵埃
姜生姜生不須慮聖賢豪傑終荒苔人生三萬六千日
會當日日眉頭開富貴於我何有哉

吳門老人林雲鳳歌行

吳門老人嘉隆間弇州大泌相接聯親見文士聲煊赫
海內望之儼登仙汗漫太清把盧敖金幢導歸三神山
尺書飛去邀萬錢蔥薤魚肉堆玉盤妖僮豔姬奏鷗絃
此時老人纔爛醉日色瞳矓恰高眠錦樹凋傷歲月晚
逝水東流隨清川胡鵲夜夜叫屋頭兩京宮闕化寒煙
詩書詩書恰欲滅摩天黃鵠翅盡折老人何地可曳裾
劇憐無食枯皮骨江邊獨立風蕭條爲歎老人淚流血
贈山陰老翁周三懋宜醉歌行

世人反覆爭機巧吾愛老翁氣義好世人顛倒誇明聰

吾愛老翁雙耳聾男女長成婚嫁畢世人誰得比老翁
萬事不挂老翁懷俯仰天地胸襟開今年呼我游長洲
月明還上姑蘇臺金柝深沈烏鵲飛北斗橫斜白露晞
酒肉如山恣歡謔雙童扶掖不肯歸吾聞陝西地震日
彼蒼傾仄黃圖裂百萬生靈化作泥陰陽破碎難回斡
寧似老翁生東南扁舟來往安樂窟川嶽不動風物優
驛路逶迤雲樹稠曾城華屋徧登覽簫管笙簧恣淹留
楚女如霜吳娃白錦筵促席奏名謳老翁老翁真有福
放浪形骸恐難續應哂碌碌爲子孫襟裾向人顏色辱

老翁躊躇感吾言還家早買剡溪船將我歌行書泥壁
倘值惡醪亦大喫

卻贈錢大長兒超麟歌行

代北掣豪鷹天闕騰麒麟吏部名父子兒郎復異人朱
脣白面皎若璧瞳如點漆顛髮黑十歲已能搦犀管文
選離騷暗指摘滾滾詞源不讓人他年定是文章伯昨
日見我衣裳單藹藹悃悃相憐惜筵中美酒賽琥珀手
持一杯到我膝老夫衰邁蓬屋姿邀汝寵顧生感激似
汝聰明在幼齡數載必通金閨籍從容須記老夫詩暇

日高眠念宿昔

寄西泠陸圻

雪溪草堂清秋涼野池茵苔滴露香青山迢迢月東出
明河歷歷雁南翔憶昨與爾呼五白袒衣繞牀時一擲
劉毅粗豪日稀少阮公放誕誰比得別來遙望南屏巔
海水明滅隔蒼煙安得青鸞下雲間錦書繫足飛上天
贈君千行萬行淚薄暮還到廣苕邊

日出入行贈鎮江潘陸

白日如金盤迢迢轉青天夕沒虞淵朝復出苦爾獨照

驕人顏我欲長繩繫其影誰能上結高高之青天下結
冥冥之重泉春花吹落斷腸去秋霜蕭颯不可言我與
汝曹日奔走茫茫赤縣疲人間才大世人皆欲殺七尺
之軀那值錢潘江如肯聽我言萬古文章置高閣青蚨
須索五十千天台瀑布插眼前潯陽酒樓宜酣眠那待
好鞍與好馬纔指五嶽拂長鞭海上白龜橫島去倏忽
已過三山巔金宮玉闕霄漢間直與東王西母筵

題宋徽宗皇帝黑白二角鷹圖歌行

君不見徽宗皇帝困在五國城父子幽囚慚且驚凍餒

哀號死不得豈能復憶揮毫畫角鷹我朝墨妙誰可比
邊昭與呂紀兩人徒能得其貌對茲面赭生慙恥不覩
高堂中漠漠絹素空霜毛側腦飄西東軒然欲下搏飛
鴻黑鷹掣從玄冥來鋌條徐墜爪距雄繪彩年深雖銷
落殺氣浩洶日迴薄戴角飛上呼鷹臺蕭瑟滿林動寥
廓安得臂爾駕駒駝羽獵平原鳴僕姑騫繫鋒稜十二
翮鳴臬破獍盡翦除筆端真豪放披覽空惆悵想渠經
營延春殿裏時縹緲如御玉清上恍惚圖成有奇姿拂
襟攘腕何酣暢宮女千行呼萬歲良嶽峰頭兀相向於

戲道君工此失乾坤始知小藝不足言徒令子規啼血
瀟湘竹竹上至今淚痕綠

擬李翰林醉後答丁十八以詩譏余搥碎黃鶴樓
我本謫仙翁親見東王公借取盧敖杖汗漫隨春風尋
仙直上黃鶴樓扁舟繫纜瀟湘東黃鶴高樓壓荊州影
落洞庭三萬秋憑陵大嘯弄明月崩摧捲入天河流太
守卻來相調笑譏余搥碎黃鶴樓黃鶴樓已搥碎更鏟
疊嶂傾豪輩洪濤浩瀚駕青雀乘風嘯傲事沈醉醉後
狂吟淥水歌白雲一片遙相對願君歸漢陽日日進千

觴錦袍吹玉笙振筆爲文章若道鸚鵡無人賦試看洲
前瑤草芳

同錢纘曾游法華山觀法華寺宋旭畫壁

法華嶢嶢天目東青蕖倒插具區中長松際天掃赤日
金沙噴礪垂雲虹清晨騎白驢挈榼復攜壺會有海叟
談方丈兼聞越客誇鏡湖不知粉壁之上圖瀛渤劃見
滄洲遠明滅眼前十二有名山千峰萬峰森羅列滿堂
紫翠紛榮光洛伽廬阜接夕陽麟洲鹿苑遙相望神州
咫尺白雲鄉金光明草堪服食採摘何由通車航倥傯

尙可到隔江空斷腸砒厓簸岸水滌迴珠林琪樹杳迷
茫月上峰頭愁倚徙縹緲飛入丹青裏杜鵑啼殺不歸
來雜花紛紛吹澗底錢生錢生見畫已移情何況眞爲
五嶽行明朝大笑出吳會龍虎鼓瑟來相迎瓊闕洞開
雲漢表玉漿一杯勸長星

客茗谿題天聖寺管夫人畫竹

昨夜秋風起苦竹拂秋水夢入瀟湘川月明茗谿裏茗
谿美箭由來傳有誰乘興圖雲煙與可泉臺黃荃死那
知猶有夫人傳子昂圖畫窮殊妙夫人秀筆凌神仙數

枝淋漓揮寺壁珠宮颯颯翠相射三四百年枯疑活青
青欲墮增寒色恍惚千峰白日暝清猿啼處叢篁寂鳴
呼爾畫眞苦心亭亭如出坡陀陰炎天大暑避毒熱赤
腳攜簞走空林奴子不用搖大扇殿閣涼生風雨吟茗
椀蔗漿僧擎出談笑久之毛髮森吾聞東坡太守日亦
寫簞簪付浮暉

賈芸老閣

驕語添丁收藏好不知堪與斯壁

相爭輝不知堪與斯壁相爭輝令人惆悵那能歸

吳興黃浦亭答董黃兼寄吳懋謙張彥之

鮑昭昔時送別處惆悵重臨憶故人上有青峰千餘仞

下有澄潭碧粼粼野鷗歷亂鴛鴦飛玩此可以送三春
徘徊月出誦皎兮忽然淚落還紛紛憶昨說萬乘譴浪
事縱橫詩成奪錦袍長嘯傲公卿蛟龍矯翼將升天沈
吟不決遂沈泉自知功名計疏拙壯心轉逐飛蓬旋任
公三千六百鈞放棄巨鼇跋清川飄飄謝安汎海裝挂
席一去無歸年賴遇安仁豁心目復睹風流逢二陸有
似陽鳥跳扶桑披胸洗出太行谷跼足復連臂壯心快
六博迢迢相約訪仙山儻值浮丘攜手還騰身排躍望
舒間渴飲紫桂壇西之井水饑食白兔所搗之藥丸我

與公等皆不死嘗有如花好容顏公等今安在寄我白
雪一何快幽簾寂且閒靜覽若遐外海上菖蒲倘許摘
階前瑤草如可得願沽洞庭春相待苧城側

寄沈翰林荃

昔在百花洲上還值爾奉詔歸雲間寫心洞悵傾河嶽
拍手大笑開雲煙撞鐘伐鼓淩滄流紅妝翠舞紛華筵
坐深葉落城西郭倏忽月出湖東山今君謁帝明光殿
視草彤庭飛彩翰承恩出入銅龍樓弱水微茫望不見
欲折瑤華遠贈君寄取悠悠一段雲聞道春暉爛漫去

滿園蝴蝶徒紛紛

峴山行贈茅槃

峴山之西日欲沒峴山之南行人絕
接離倒載有阿誰
吾與茅生掉湖月湖月初生似玉鉤
挂在銀河天上頭
桂樹無枝攀不得蕩漾澄波增我愁
我愁浩浩橫江海
溯擊空明淚還灑借問青山幾萬春
放誕風流有誰在
長嘯浩吟歸去來呼兒且開食頭
酌兩人對酌三百盞
醉後重傾五百杯但貴朦朧幕
天地雙眼寧爲俗人開
君不見東流故是無情水
曉夕如箭太湖裏君不見丹

崖綠草縈白骨疊嶂連峰去未已有酒不必桑落清有
歌不必陽春名濁醪可喫歌可聽旋倒敢惜玉山橫阮
籍劉伶氣吐霞世間富貴何足誇不信豪華有零落明
朝再踏東園花

梁父吟

長嘯上梁父還作梁父吟吟成涼風發潏潏淚霑襟聞
報哥舒已破虜兵連三月殘黎苦黃河西岸震鼓鼙鳴
綠江南橫干櫓又聞鼎湖騎白龍王孫乞食困戎伍九
州流血城城滿明駝銜草蹂中土思明未擒祿山驕兩

京安得歸王朝洶洶大勢實難定漠漠殺氣連雲霄
酈生旣已困酒徒張良避仇在圯橋沛中不謁赤帝子
世人輕之若鴻毛何況吾輩顛毛已如此側足焦原無所
止苦隨亭伯走遼東笑隔蓬萊一杯水前度渡江越城
青轉帆側施指華亭越城每道朱家士好心雄萬夫合
傾倒華亭更說吳生懋謙奇文章建安名譽早結襪誰云
勞結交任人道心肝洗出如青天廓落無翳淨若掃六
月荷花開大洲鬱金柳色搖深愁主人自是董糟邱拂
袖攜手登高樓文瓜朱李堆盤饅酩酊坐邀洞庭月咳

唾直捲太湖流人生達命自瀟灑攀龍附鳳自有在人
生得酒須痛飲百年幾何不復再謝安高臥歸東山角
巾攜妓日往還救濟蒼生終不免且須睥睨消人間

寒食行

徐晟筵中作

何人倒接羅日日酩酊回茗上顛狂客行吟歌落梅吳
趨小兒攔街笑笑我貪飲醉欲頽穠花間桃李清明連
上巳誰家海棠一樹紅迴鞭緩踏花陰裏露滴風搖萬
朵鮮朱明霞繖千重綺吾生最喜繞花行洞庭春酒故
須傾頻呼主人來揖客開筵布席對繁英滿堂笙管嘈

約園刊本
嘈發能和花間春鳥鳴勸君酒歌昔昔主人起舞日將
夕簷前落花未成碧大醉眼不開抱琴歸去來倘君有
意惜芳菲曉來與君更上西施臺

和沈寬夾山漾曲

余是鏡湖人浮家湖州府君是西湖客偶來到此土人
如列麻不足賢盪舟自棹夾山間流水如霏藍遠樹團
蒼煙白鷗飛來處紫鷺隨棹去萋迷兔絲蒙分明女蘿
曙眼見捕魚翁會得滄浪趣滄浪一曲落日紅銀濤似
屋太湖中迴波搖曳夾山漾石門左轉青濛濛疑是武

陵谷雞犬桑麻綠丹崖秀玉芝白沙映茅屋笑指巖巒
不忍去月細青青出林麓鷓鴣啼月愁空山風色蕭蕭
悲擊筑抱關遠謁信陵君賣漿屠狗皆奇勳自當拂衣
去人世扁舟直下桃花津

山陰贈朱二十九驛元

胡雛秣馬黃金闕天驕萬里射漢月君抱才華不得伸
我還枯槁遭摧折一身悴憊絕無成千里間關阻甲兵
每憶故人隔州縣夢魂繚繞苦竹城寧期殘臘走禹穴
蠟屐幾雙衝冰雪親上君堂見君面相看驚喜復嗚咽

昨朝爾兄

士稚

同我游江上寒風其敝裘吹簫赤腳無所

往長跪乞食敢道羞飛蓬飄泊落此地又遇君家稱大
弟豁我積悶開青天悶去排愁如決泉君今爲我揮翰
墨君今爲我排酒筵招致詞人三五輩振策逍遙東武
巔渺觀滄海大如掌秀攬赤城青如煙不然百年遺勝
蹟空餘玉館悲平泉君持大杯淩煙虹百罰潦倒情未
終杯盤狼籍喧四座笑傲直欲傾崕峒人生相逢旣適
意苦若浮雲吹卽去騎驢要覓剡上山壁上題詩莫復
棄

題姜閣老曰廣絕命辭卷後兼贈其從孫文鎮行

腳

峇峇洪都府花開鐵柱新神仙道寂寞儒林振芳塵壯
節渾蒸彭蠡澤鴻名還照匡廬春汗青竹簡書不盡舉
頭河嶽垂星辰憶昨京華全盛年相公輸丹謁九天龍
駒蹙蹙紫邏道方巾大扇公卿間翰林彩筆動御座講
筵親侍玉皇前折檻直褫權姦魄精誠浩薄回聖顏左
右拜賀呼萬歲鳳毛齊慶襲龍會青蠅空擬玷連城白
虹已貫扶桑外漢家天子玉燭調學士清風播兩朝南

渡更擊朱泚笏勁氣力排馬阮驕一朝拂袖騎鴻鵠江
湖動有匡山哭破產遠求滄海君事雖不成忠可錄雷
霆憑憑魂在天雲日慘慘鬼嘯煙滕王閣上子規叫滿
門同日起黃泉不爭滿門赴黃泉又值從孫避雪川身
服抖擻面黧黑見我敷陳涕泗漣曉行石橋暮投寺勸
君且注逍遙篇

寄雲間王光承王烈二子

春風爾來能幾日忽見楊花皎如雪東城乳燕西城飛
憑軒坐歎芳菲歇煙橫浙水恨悠悠朝夕懷君涕泗流

願將浮玉山頭月照爾春申江上愁

上宗伯錢謙益

小謝清標能染翰前身卻夢劉公幹分明謫墮千年來
壯心疏豁長貧賤聞道尙書擅風流角巾嘯詠東山頭
豪士追邁傾宇宙文章瀟灑映滄洲弱水由來限吳越
蓬萊神仙不可接今日相逢借片顏願邀一榻白雲間
秋夕讌集吳松顧有孝北郭草堂顧請予作抱甕
丈人歌予時大醉爲賦此篇不自知其潦倒也
憐君傾家羅綺筵白羅倒著華堂前廣樂直接洞庭野

臨風玉樹繞朱絃彈琴跼踖競遊戲逍遙散髮凌雲煙
謔浪舞長袖揚揄扣銅盤忽然涕橫集慷慨惜暮年時
人不識阮嵇輩爛醉且歌抱甕篇歌抱甕杜世援行徑
已在禦寇間何須問君然不然但能豪飲卽神仙不見
酒星三四五舉頭歷歷秋河邊

歸吳興草堂寄懷吳門周燦顧樵徐松周安徐耿
吳炎沈自鋌顧萬祺潘檉章周撫辰諸子

野夫昔居括蒼山桃花流水白雲間野夫今居天嶼側
錦石嵯峨連霄直常騎白鹿訪神仙手植松桂石壇邊

饑來還拾梅溪椽抱琴無事長晝眠憶昨月華照江國
江花漠漠送愁客相愛相將盡故人一歌一詠壯顏色
子雲著書歸北堂春芳辭條復秋霜爲問門前車馬道
芝草琅玕幾尺長

桃花陽月室

有序

月室者潘菊旃先生桃花陽中導引之別室也周蔽
垣版黝如子夜窗逗小隙倒納日景初入此室都
無所窺久之乃見白光乍引纖毫悉辨肌體之間漸
霑寒色畊與二三朋輩游息其中雖隆春盛暑恍若

仲秋之月積雨新霽金飈晚涼纔披鶴氅杖逍遙
朗朗然見月出海門而升東山希微生悅澹焉忘歸
也畊聞談玄家虛室生白之言而未覩其理於今始
識其趣爲作此吟以誌是室之異

憶在太白藍田巔坐看明月出雲間長風萬里吹山月
行如轉蓬不可攀我今南歸太湖裏可憐月華照流水
洞庭兩峰金波搖銀河映徹瑠璃底還攬湖月遠贈君
北山蘿月涼紛紛朗朗明月常在抱白日照見梁棟塵
烏皮髹几焚妙香九華寶扇敷玄論我爲月室吟徘徊

月室中太上琴心琴三疊姹女丹還大道空與君飛入
玉清表霓裳歌舞廣寒宮蝦蟆靈藥白兔搗日服一丸
顏色紅

大隄曲

前溪潏灩歌吹臺辛夷落地菡萏開輕風直過桃葉渡
兩槳催送莫愁來莫愁窈窕如珠玉自矜芳華珠百斛
調笑不慕漢秦宮黼帳孤燈嘗獨宿秋去春還花信多
斂態調箏倚修竹忼慨纏頭動十千流霞豔豔不願前
東方使君腸自斷葡萄館裏花自妍葡萄繚繞會有樹

游絲牽合會有期只羨蘭芝守故交長作廬江小吏妻
金燕銜泥且欲好銀蠶吐絲待將老誰知缺月不重圓
季倫意氣空懷抱繇來名士悅傾城絕代佳人貴有情
今日相逢爲情死黃壚相誓各分明明年年孔雀江頭飛
夜夜鴛鴦冢上啼寡婦聞啼起歎息愛殺東南連理枝

沈長山張七隱居二首

日出杲杲東西廂狗吠深巷雞鳴桑有客叩門登我堂
何以娛客進客觴撥刺白鰈三尺長

又

菡萏始發芙蓉池蜻蜓蝴蝶相對飛河魚大上行人稀
白鳥啞啞啄城西會看射鳥鳥落時

彈鋏歌

我生豈無命何爲使我漂流天南海北嗷日與腐儒小
子論詩書脣乾口燥不得休誰言人生直如矢蒼蒼反
覆曲如鉤不見城中達官騎大馬殺人多者居上頭會
須覓取百個錢日醉洞庭岳陽之酒樓俯觀波濤千里
相橫擊銷我千古萬古之憂愁

醉時歌與朱廿二

神廟宰相朱金庭有孫豁達逞豪英黃金白鏹隨手盡
一身落魄東南城可憐疏布纏粗骨蕭瑟秋風不掩脛
憶昨破屋藏亡命事敗何如燕荆卿頸繫青絲腳拴木
同日義侶被束縛爺娘搥胸不敢送親戚攔街齊慟哭
先生毅然赴法曹睢陽寸縢知無逃眾囚相對破濁醪
掀髯長飲聲轉高金雞此日瞳矐赦隻身生渡錢塘潮
才雄萬夫遭人怒名垂史冊有何補年來吹簫過黃歇
乞食尋常徧環堵與子同病更相憐河上之歌聲最苦
烏程縣前酒如淮橐中有錢傾百后脫帽慷慨搔白首

更闌銀燭盡三枝
勺鹵細盜阨宣帝
宋野狂徒挫仲尼
自古聖賢皆如此
輾軻蹭蹬復奚疑
不見青春庶草抽
倏忽西陸繁霜隨
人生有酒須當醉
豈必終日求人知
升沈聚散任小兒
我曹安用苦躊躇

季夏山陰駐駟潭
周翁懋宜邀余過
其綠綺堂款洽旬
日其嗣珏瑩璫瑩
旋瑩三君皆余舊
好請爲長句觸興
漫辭略無詮次云

銀甕器車世所寶
麟角鳳觜由來少
周翁有此三郎君
在於畊也早絕倒
三君侔儻皆好奇
劇憐潦倒不相疑

扁舟招余綠綺堂雙紋竹簟垂紫帷綠綺堂前秦望開
沈嵐積翠照行盃尋聲雷雨來天姥涼風颯颯往復迴
筵收霞晚眾賓散花稠牆角堪徘徊人生汎愛真何益
如君兄弟那可得敕婦常辦香秔飯調羹親致金絲鯽
佳肴美饌飽腹眠重愧衰顏何厚德石瓠江海舉俗嗤
病驥鹽官哀日昃但看公等項領成野夫道路何足惜

贈密移闍黎

王烈不可尋石髓故難得騎驢二十春飄飄無定域昨
朝小艇下錢塘千峰日落桑葉黃鮑照曾攜惠休句少

陵臥疾贊公房辛苦開襟示真率艱難把臂有多日食
我醅醕發性靈貽我氎布扶衰質月出金牛步遲遲風
吹青井楊柳枝飛飛鴻鵠天涯遠爲君索笑一題詩

杭州西湖酒樓月下吟

壯游汗漫豈暇愁載妓還駕文杏舟西湖酒樓臨湖水
玩月何必待清秋畢公任誕風期好蘇門高笑襟抱幽
漆園爲吏烹池雁列寇遺文狎海鷗古來豪達盡如此
爾我不用頻啁啾揮毫須排黃鶴句搖筆會翻鸚鵡洲
但願素娥垂兩足桂樹團團天上頭金波萬丈準在眼

卷慢清風長悠悠

南屏夏夜柬懷徐行時送客入三峽轉之滇中

別爾凡幾年關河多勞苦青芻白飯逐馬蹄瓜田不納
烏足數炎天大暑喘吳牛爾居陵陽我滯留送客三巴
之西珥芙蕖香徧南屏洲主人調絃奴附肉清怨迢迢
吟山木清興疑是剡溪來簾開湖月皎如燭今夕斗酒
會明朝隔塵寰遙望昆明路不見點蒼山石鯨織女杳
何在金芝翠蓋有無間一日復一日鴻闢音長絕歲歲
題詩送白雲疊嶂愁猿鳴未歇靈均懷沙杜若川張翰

貪杯秋風邊尺書借問嚴夫子犯槎何日許張鸞

雪翁詩集卷四

七言古

雪翁詩集卷五 七言古

明慈谿魏

惜尾騮行 有序

金山衛人買一騮毛色蒼白身橫丈五尾長八尺尾鬣
丈其人得之甚賤而多病蹇劣行道蹙蹙策之不動
尾蓰蓰泥塗腹脹欲顛而性喜嚙人主人惡之將市
之屠牛者會胡賈見其騮歎曰此惜尾騮也胡爲在
此乃問主人市之價五百躬爲洗刷分其鬣剔其蹄
梳理其尾尾結一球秣以精芻食未竟而騮已噴薄

長鳴視其狀有騰蹕千里之意主人曰此何騮哉胡
昔憊而今良也胡賈曰大海之濱多蛟龍往往與牝
駒攻產龍子此故龍子而矜尾特至余識其性摘之
飭之故人馬相得人馬相得神故鬢聳曾何病哉語
已於是胡賈躍騮而去倏忽不見丙戌歲吳江人王
懋功游金山親覩斯事爲余道之如是余聞其說賀
此騮之遭而頗怪主人久與周旋祇以病顙相遇也
嗚呼自古豪傑之士方在草澤圉圉無所見長欲求
知于庸眾宜其所如斥落耳

君不見騶名惜尾無人識精光莫錯道路側青芻不飽
槽櫪間驚駘凡駟相欺得碧眼胡雛來海頭惜尾一時
聲價優金刀翦出三鬚鬣冰絲結就五花球胡雛牽來
無不愛錦花匝匝矜豪態初飾龍種排雲霄始信麒麟
絕流輩超邁流輩非等閒胡雛騎至玉門關朝行拂雲
祁連草暮行飲水銀海灣自是逸羣騁絕足雄姿峭崿
眞天育嗚呼不遇九方皋腰裏空奇埋空谷如今草澤
多沈淪馬有肉驥龍有鱗雖遭困頓是神物侮之或恐
致怒嗔

白蘋洲上寄蕭然李生文達

蕭然李生漆園流生平放達無所求堆牀只愛王湛易
把釣常披嚴陵裘雪竇山人嵇阮輩風流散誕事沈醉
瑪瑙瓶開香且清褰簾日與明河對明河一片接東城
蘋洲瑟瑟起秋風長吟白雪望不極青楓滿眼愁飛鴻
聞道湘湖蓴可採紅泥欄檻園亭在山中桂花開如霰
角巾來往搖清珮相愛相尋臥白雲拂衣同調唯有君
何須引麈笑掩口高談王霸徒紛紛

題餘不山人秋山圖引

餘不山人錢鏗後畫苑由來稱耆舊家住吳興桑苧村
繞屋森疏垂橘柚昨出秋山錦樹圖老眼摩娑拂雙袖
數峰嵐彩入遙鴻萬壑泉聲瀉清晝中有仙翁兩角髻
縹緲登樓攬遠岫琵琶江水映日寒峨眉山色連雲秀
我昔巢栖雪竇巔天台赤城相鉤連山中白雲自怡悅
手把黃庭企腳眠自從飄泊苕溪邊泛宅浮居二十年
至今懷想空回首披覽丹青猶宛然秋風夜下銅峴渚
明月人歸笠澤船何時橫笛騎牛去贈君峰前玉井蓮

題祁五弟理孫藏書東樓

東樓雄雄何壯哉側邊鑑湖水滌迴鑑湖澄渟漾碧玉
登樓縹緲天際來朝嵐夕翠紛光彩賀監風流千年在
敕賜曾傳臺沼榮豪華南壓紫泥海祁家冠蓋宇內聞
卻於此地藏典墳縹緲每炤射的雪藜窗倒映秦駐雲
由來宛委青霞閣恨無便便稱腹笥今君才高第五名
獨坐東樓披薜荔七月八月暑氣清孃孃池塘菰蔣生
揮蠅不須白團扇褰帷嵯峨雲縱橫知君此時興瀟灑
香燒博山書滿把我生落魂多遠游校讐常到文選樓
公子肯著離騷賦一緘尙慰羈人愁

和王猷定聽楊太常彈琴作

有序

粵人楊正經字懷玉前太常也善彈琴世亂服抖擻
衣以僧相往來江淮淮有張爾常者任俠來四方之
客所居城是昔年屯兵地兵去瓦土崩疊牛羊糞盈
敝屋中若螻蛄之塞過客例不入獨爾常編蘆作室
偕弟虞山與居太常主之三人晨夕絃歌不輟而豫
章人王猷定擅文筆負時譽亦游寓金陵數郡間每
扁舟過張廬聽太常撫弄與之相得作彈琴詩且序
其始末謂正經本西陽宣慰使司代有戰功迨正經

自爲將值己巳之變從思石提兵入衛援山海關剋
復上谷欒城諸地其年入奏受知毅宗烈皇帝召見
便殿審定五音暨郊廟諸樂章帝謂過於師襄云當
時客有請賜琴出觀者正經輒悲動淚縈睫丙申春
山陰朱廿二從淮上來出猷定所作詩并序余感其
事遂援琴鼓三曲而和之且用寄楊及張王焉余誦
王詩第四篇註復載楊對先帝言今日之樂角音失
傳而所賜琴是唐製闖賊破京之日琴自鳴者三嗟
乎精誠所孚義感枯木宜好事者傳和不朽矣

嗟君久作緇林客，流離道路人不識。
蔽體空餘印度衣，緇經賸有烏菴譯。
夙昔殺賊欒城東，笳鼓奏凱乾清宮。
九重聖人賜顏色，曳裳佩玉搖春風。
論律更重泠州鳩，樂府新傳鵲樓從容侍。
從稱仙吏芝蓋淋漓鳳闕游，蒲桃盈枝柳森束。
黃鸝低飛紫燕逐，樂往哀來歲月移。
惆悵京華愁滿目，飄零此日復何求。
抱琴寄食淮海頭，橫膝倘逢知音者。
爲君手語鳴清秋，雖然不是廣陵散。
也知疏越勝箜篌。

江上與姑孰陳瑚

君不見山陰朱朗詣開口大言輕一世欲回白日上青
天鷗鵬折翅終泥滯又不見吳江顧茂倫縱橫逸氣直
絕塵黃金使盡兒童笑垂頭莫錯閉荆榛兩生栖栖曾
如此今時莫展雄豪技聞君下帷不稱懷與君高歌送
暮齒江頭相見且遨遊攜手直登萬歲樓酒酣興發搖
江漢笑殺當年鸚鵡洲

琴臺歌別夫山大師

靈巖古寺碧雲隈巖從危石聳琴臺琴臺四望太湖曲
霧中遠樹洞庭開中有比丘沙門寶玉臺婉轉雙眉皓

說法常登兜率天散花多染苾芻草雲山滿目不可攀
借問何人最往還毘耶城裏羅菴叟曳杖時叩青霞關
長廊偈畢飯僧夕攜手林泉恣游適萬壑霜清九乳鐘
松風朗嘯月華白塵世浮名詎足榮祇有清境難忘情
歸去焚香相憶處漠漠簾前春草生

崇聖院竹

崇聖在萬松嶺西爲故宋寂音尊者
宴游地種竹滿庭額曰竹尊者軒

昔愛篋簾畫如游篋簾谷今過崇聖院篋簾宛在目
幹枯森森翠欲空杳然影落庭除中深宵寂寂搖明月
驚猿瑟瑟悲清風徘徊去不得撫襟增歎息琅玕蕭疏響

四壁曾聞天竺古沙門當時種竹湘西村琳宮珠殿卻
煩暑蒼梧雲夢度雨痕蒼蒼疊嶂虛碧映藹藹飛嵐翡
翠紛羽人跨鶴何年入鍊藥丹砂幾歲聞沈吟轉發滄
洲興歷亂因之夢海雲

客吳卿楨園齋最久酒中爲長句奉別兼示令弟
理楨

四月鑑湖滿五月芷葉疏園裏新篁初解籜公子茅堂
聞讀書余是悠悠失路者買船遠向州山下見時但言
苦風波金花臘酒盞對把君家雄詞絕世塵曾獻文章

觀國賓迎門不揖珠履客開懷偏愛蹉跎人前日醉稱
從弟豪池塘好句昔所標歌舞筵中邀我去興酣肯出
鄭櫻桃髮長七尺指爪秀月畫雙娥舞態饒抱愁卻欲
還茗上長江恰遇白頭浪挂席天邊凌雪山知君兄弟
多相望飄然撫劍越關河兩地遙憶情如何秋來鴻雁
應不少試寄雲中錦字過

寄題吳江王開士定寒松精舍

相愛由來隔州縣曾送哀鴻淚如霰念爾悠悠湖海人
櫻梅弄色不忍見憶昨泊舟吳江頭金花臘酒澆我愁

竹林遙望洞庭雪，明月早上西城樓。
鶻冠戔戔四明叟，移家近住蒲帆口。
水遠天長無信來，春風自倚門前柳。
須知安石臥玄關，支公未買沃州山。
他時倘有蒼生繫，功成拂衣開笑顏。

暮春留別吳江趙瀚兼指月上人

昔登吳江快風閣，遙愛閣前明月渡。
今來鶯啼三月春，繫纜江閣看江樹。
江樹沈沈映碧流，洞庭雙峰天際浮。
主人一樽又長滿，開我胸懷萬古愁。
我欲揚帆拾海月，雲月徘徊不忍別。
去尋仙客跨石梁，桃花洞口斷我腸。

他日還舟重相訪會識洲邊杜若香

贈沈二永馨

沈郎沈郎二十餘面如珂月眉目疏迴出神仙度瀟灑
臨風皎皎開襟裾昨日客游松陵道滿城飛雪梨花好
瑪瑙傾來玉乳香意氣逢君耐醉倒吳江城裏多少年
緩帶翩躚君也賢懷袖琅玕莫浪與犢鼻風流須自憐
君不見終軍棄繻者欲繫單于致闕下跣跣駕終無
成淩煙欲畫誰爲寫又不見謝安東山人往來剡縣清
角巾手把蒙莊揮麈尾卻能談笑滅胡塵

題顧樵山水圖歌行

我家昔住鑑湖東開門遠望香爐峰一灣流水當草閣
夭桃薔薇相間紅二十年來事飄宕雞鳴駕車暮五兩
功名蹉跎仙不成襟期騷屑色沮喪蘇州友人顧虎頭
能拂毫素豁我愁昨畫鵝溪絹一幅森森墨氣天際流
丹崖插霄巘突兀滄江若練樹如髮乘風破浪扁舟人
兩岸啼猿送曉月毫末復覩花紛紛枻櫓岡頭春氤氲
路傍忽有墜驢叟疑是當年陳白雲撫掌大笑亂未已
夾馬營兒今始聞嗟哉顧夫子爾畫有高格披覽煙霞

臥游間令我懷鄉淚霑臆魏生魏生歸去來四明洞天
接天台飽聽松風琴一曲招鶴還上諾那臺

寄吳鏘畢映辰葉舒胤

陵陽城西秋夜寂援琴起奏四明客苦竹蕭蕭拂檻斜
珠露垂垂滿空滴月上高明歌且彈玄鶴長吟去不還
懷人河漢清淺裏迢迢東望阻吳關我望澄江路微茫
在何處擬買蜻蜓舟挂席雲邊去未識茱萸灣口尊夢
中先繞三花樹

之秋浦別張拱乾董二酉

春風凡幾日江頭楊柳黃
壺關董公顏色悴韓國張良
眉髮蒼昨日相逢意氣多
青絲玉壺金叵羅酒酣寶帶
挂庭樹送余還爲秋浦歌
我今向秋浦相思渺難絕
秋浦騰猿皎若雪引予澄潭
窺皎月行到李白舊游處
石上題詩未曾滅未曾滅
重徘徊安得道人如公等
漱鍊乳液九層臺生聞仙樂
從空來

欲謁虞山錢大宗伯途中書懷先寄柬呈覽

四明狂客四十餘擊劍拂衣
意氣疏汎海飄飄洪波詠
落魄淒淒下澤車來往茗南
復茗北門前五柳垂金色

明月橋頭酒一壺醉來高臥清溪石前歲縱橫計不成
仰天大笑還振纓授書恰思下邳去采藥乃向玉山行
玉山彩翠搖蘿樹仙人樓閣雲邊住中有仙翁餐雲腴
印心曾把楞伽註峰西白鶴破鴻濛翩躚有客駕長風
雖然未進胡麻飯曾識井上雙梧桐

寄贈婁東吳學士偉業

我愛天祿校書人繡虎才雄羣仙表常將奇翰動明主
接羅倒載長安道清平供奉非等閒聲名流播天壤間
五侯七貴得片字華堂始覺開容顏棠梨花發燕臺口

春風搖曳御河柳手版朝朝對掖垣謝病終思偃林藪
幾時餞別青綺門還向江南迴馬首浮雲富貴疊風波
罷官歸去又如何當有三山雙翠鳥巢君庭樹珊瑚柯
憶蕭山湘湖贈蔡士京

昨夢湘湖雲嫋嫋青蘿月覺來欲汎季鷹舟已值子猷
山陰雪小窗獨坐醉流霞浙水茫茫道路賒相思欲寄
無雙鯉極目飛鴻天一涯春風綠潭倘可涉洞門試掃
石楠花

代寄朱黃門

昔掃黃金臺上塵燕麥青青京華春潦倒時跨少游馬
意氣不讓田實賓夫子紅顏抱才幹白筆能回英主盼
開臆蒙垂納履恩歌駒獨出邏城餞我似鷗鷺還吳洲
天目著書文選樓君逢聖世日華際大羅仙子住丹丘
白雲映雪相思遠綠蘿嫋樹春風稠江南又是梅花節
空簾獨宿夢悠悠

鞠歌行

麒麟飢來無所擇搖尾不求狐兔食驚驚倦歸無所棲
繞林不奪鷦鷯枝丈夫途窮困苦亦顛顛豈肯脅肩諂

笑事權貴江上白雲若可乘我將曉渡黃河冰直登太
白藍田頂大嘯散落千巖聲舉棹欲游天路修以頭觸
天天爲愁長風吹月滿瀛洲還當獨坐彈箏篴

贈韓純玉棗騮行

當今馬癖最有誰苦心只數韓公子昔買盜驪寵且矜
今傳棗騮狂欲死腹漩點點汗班班巧賽桃花毛色鮮
牽來吳王鬪雞道騎出孫楚酒樓前頭絡璐題傾城見
蹄高玉蓋傍人羨撇眼驚塵霹靂飛不讓蘭池追紫燕
公子豪華真風流囊中有錢那用愁青溪小姑春可借

西曲孃家客晚留桂枝倒挂珊瑚玦醉墮落花嘶未休
聞君更有飛龍影亦是龍種聲價道何時與君並轡起
馳驅峻坂風颼颼長鉞突羽隨手抹南山射虎還封侯

柳麻子說書歌行

昨歲客游江都城說書共推柳敬亭抵掌談天縱侈辯
馳驟不必皆有經出門人呼柳麻子往往攔街不得行
何家相國酣高譙桃李青軒嘗引見堂上遮留麒麟車
簾裏徘徊孔雀扇風雨颼沓動鬼神片言落地咸稱善
崇禎之際左將軍意氣如山天下聞開筵日召柳麻子

牙門羽騎羅紛紛齊聽柳麻說漢祖胸襟豁達龍顏君
貌出英雄天人際烏騅叱咤非其羣將軍大笑遺雙璧
還贈雕鞍龍八尺居常喜著火浣布醉後頻敲綠絲幘
全時湯鼎擅琵琶寵愛豪華難與匹詞源屈注天河傾
後來無人奪其席十載飄飄旌旗紅柳麻柳麻老成翁
有眼日睹尋常人東西南北道路窮君不見唐時工部
杜少陵翰林供奉李太白彩筆光芒干雲霄人間萬古
稱詩伯落魄風塵逐馬蹄腹中無飯常唧唧

寓山園亭

山陰亭子多古迹寓山瑤草萋萋碧若非班生爲地

孫

主何繇一踏蘋洲客乳泉磁枕最斯游水檻雕欄恰相
適薰風芝閣茱萸園斜日虹橋水晶域解衣偃蹇攀桂
枝落花已滿清樽側是時老夫頗潦倒喧呼起舞無所
惜座中張五杉建安豪請我歌行書石壁停毫卻憶梅
子真藏名此地幾千春年來更憶祁忠敏重爲翦闢編
荆榛倚徙試待鑑湖月還與汝曹飲數巡

送劉俊還衡州

雲帆嫋嫋涉江去揮手神仙不可住憶昨鳳凰城北隅

逢君迴轡芳洲暮春夜沈深秉燭游解佩當壚上酒樓
參橫同抱燕山痛曉來獨結湘雲愁湘雲縹緲睇三巴
遠樹桄榔接翠華秦人雞犬復何在桃花深處問君家
衡山有鶴朝朝至尙期銜寄相思字

觀趙翰林孟頫所畫少陵飲泣圖引

元初畫者四大家人物獨數趙王孫我朝畫手唐伯虎
亦擅此技稱專門昨過賣漿薛公宅請我觀畫滿廳壁
後出少陵飲泣圖卻是王孫真筆跡王孫王孫爾何畫
斯圖令我見之生嗟吁形容枯槁布袍垢山坂蹙蹙跨

白驢蒙面號咷身欲墮紫髯之奴還相扶想在峨嵋入
蜀天未經靈武卽位年秦城桃李胡塵蔽興慶龍池秣
馬邊羌奴虜策晝夜嘯天開地裂殺氣連兩宮消息望
眼穿不然何由淚如泉好語辭夫子爾還收置匣笥裏
清明上巳花滿江慎勿以此挂高堂恐有天涯憔悴客
撫時慷慨霑衣裳

成都行

君不見昔日成都府公孫躍馬臨江浦號稱益部甲西
南蒟醬竹杖何煩數前年之春海棠紅青絲白馬張獻

忠麾戈呼噪雷霆黑滿城屠戮錦官空我軍此時在青
坂慷慨赴義輪不返至今兩川泣杜鵑熊羆嗥風虎嘯
晚嗚呼安得聖人駕六龍直法秦漢徙關中再闢魚鳧
與蠶叢分我浙直輸挽功

丙申夏以事之山陰客祁生班孫宅其伯淨超毘
耶居士後身也他日邀余游密園宴飲因爲醉歌
旅游昨借祁生榻毒熱正當三伏中高棟層軒眠不得
開簾兀坐苦無風祁生有伯龐公亞邀我置酒密園東
鋪地食單松陰冷憑檻隔岸荷花紅磨刀那藉設魚膾

薦殖何煩羅辛蔥冰盤雪藕堆四座青芹錦帶甘野翁
涼飈颯來紛可喜清觴遮留移日晷幾載風塵僕馬悲
新歡繞接祁翁美我欲遡流上荆襄自傷枯槁已暮齒
飄零會寫千首詩潦倒終當付泥滓維摩好道尙愛才
朗吟相對澄懷裏後期握手贈牟尼他年還駕琴高鯉

題贈祁理孫畫像引

余也不得安禪師粲可茫茫奔走赤縣裏朝隨屠販上
長安暮逐吹簫涉江汜山陰祁生三十餘已能高蹈謝
塵居昨出畫像令我題宛然跌坐淩清虛高齋漠漠閒

花落松風萬樹臨絕壑披圖儼向雪山行縹緲金仙來
綽約祁生聞爾獲髻珠門種朗公橘幾株魏畊他年拂
衣去楞伽一卷須相與

客舍苦熱忽得蕭山傅生宗札沈生宗功詩數篇
輒寫長句酬贈并寄毛子奇齡

山陰客舍溽暑邊惱觸鳴蜩聒不眠隔牆有松如車蓋
翠蔭亭亭不得前扶南甘蔗何處覓玉井寒冰太直錢
狂搔白首揮汗坐不禁涕下迸流泉忽獲傅生書一札
子雲妙筆錦重疊又得沈郎擲贈言頗似曹植白馬篇

蚊蚋營營且秉燭老夫披帷三過讀更深海上金盆
垂頭側立煩童僕憶昨老夫喜染翰壯思要命神鬼哭
常擬文章較天祿誰甘瑤草埋空谷竭來出門無馬騎
蹇衣徒步荒山麓篋中雖有驪龍吟不救妻孥溝壑辱
公等年少春正芳已能解卻紫羅囊努力豪鷹秋翮迅
決驟驊騮筋骨強自能一日聲價滿豈知老夫哀佯狂
試覽老夫苦熱句還與毛子摧肝腸

洗硯池醉歌送朱士曾歸山陰

我醉欲眠碧窗前逢君駿馬墮金鞭笑罷人催上馬去

愁我牀頭無酒錢朱家夙昔推大雅須醉吳興豪士者
城邊演漾洗硯池供君十日好揮灑硯池四面臨高樓
疊嶂飛嵐繞丹丘翰墨曾傳趙承旨今朝飄灑接風流
吾髮蕭條生年蹇恰值良朋事游衍三杯忽笑東方朔
青眼卻看南門峴會識胸懷長抱春詩成雲月照松筠
座間詞客四皇甫謂錢价人志熙志焯志蕪昆季況有逸調躡前塵攜
來相送河橋上風帆浩浩不可狀歸舟倘贈三花樹天
柱香鑪時在望

太湖明月歌贈蕭鍊師

太湖八月涵秋鏡好與月光流彩並萬丈金波飛始來
何人卻有扁舟興角里先生九華巾玩月買醉蘭陵春
扣舷宴宴洞庭去浩歌迴激來天津織女機可攀游仙
不得還不得還兮騰虎關雲中君兮招手閒瀲灩倒懸
金銀闕蟾光掩映芙蓉顏君不見蘇耽化白鶴城郭人
民已非昨又不見茅盈入句曲至今兄弟跨跛鹿古來
其有不死方何愁落月滿漁梁舞霓裳兮樂事賒黃金
成兮融丹砂飄飄更踏崑崙去還與夫君採月華

登香鑪峰歌

君不見香鑪碗礪四萬八千丈勢掩天台雁宕之高山
騎二茅龍升青天我嘗于此窺人間滄海浮一杯江水
渺似環扶桑日出雞三喔擾擾紅塵飛不還飛不還凋
朱顏青山舊時骨纍纍我嘗於此發長歎乃與酒徒嵇
阮輩夜月嘯坐松風關聽雙成之吹笛悅麻姑之垂鬟
幽篁蕭瑟溪谷潺湲我欲不去惆悵盤桓送君還兮下
城闕城闕遙遙不得閒何時攜手採芳蘭

久別離

別來五見櫻桃紅雙飛紫燕入簾櫳櫻桃花落子纍纍

紫燕巢成雛西東相思不相見空房妾腸斷夜夜夢遶
天邊行愁隨春草長歷亂紗窗泣上流黃機織成錦段
裁爲衣好將遠信憑鴻雁望斷瀟湘路已非待來兮秋
晚封情兮減飯青鸞憔悴彩雲裏化石江頭終不返

早秋湖城南樓讀錢霍山陰所作詩

夏日跛腳臥早秋登南樓招手不相見悲來涕橫流沈
酒東平酒徘徊斜川柳白雲如上海上起瑟然欲雨清
林藪須臾雲開月華朗對酌恨無山陰叟仰望天河吟
君詩風吹蘭葉步遲遲羨君詩如彥伯好奈我徒慙謝

尙知風流兩地昔爭妍才思絡繹壑赴川欬珠吐玉無
人憐千言不值一箇錢安得世有趙王賢憐君詞勝謝
榛篇美人寫出琵琶絃醉來舞袖承其眠一時相逢各
潦倒鬢生秋霜颯已老惟有酒中樂事多死去便埋無
所惱丈夫但當猛虎步眼前屑瑣安足道苦竹蕭蕭拂
檻哀鑑湖雁落沙滌洞尋仙果協滄洲諾小艇山陰雪
後來

白雪歌懷祁六

何處白雪飛上天飄飄吹落鏡湖前
羃歷青青女蘿樹

搖曳濯濯紅粉蓮我欲因之到君邊錢塘波起心茫然
但見楚雲纖似綺復道吳雲薄似緜隨人東郭忽南浦
映帶樓閣何澄鮮我愁萬古愁不眠欲對君言無一言
慷慨抱琴振商羽拂石彈之幽澗泉披襟朗然太清裏
送彼白雲揮五絃揮五絃歌已傳秋來非無鴻鵠翼願
寄麻姑長翩翩

贈長洲陳三島

雲門山人勸杯酒東園花枝頻在手花落花開總憶君
二月春風別來久雙飛海燕度關津口銜錦字渺無因

願將西子江頭月留照蘇臺梁上塵

長相思

妾居鳳凰樓君戍雁門關
長城三千里塞草五月寒
一雙白羽天山落空留可憐
凋朱顏牀上相思枕手中金
約環我欲拉雜摧燒之不忍
燒之還長歎龍鬚席可捲
望夫石彌堅東園蝴蝶西園
燕斷腸花發淚斑斑妾心
不似長江水浩浩東流去不還

送潘四弟古琳之金陵

昔余好游俠曾爲咸京客
忽逢胡馬驕仰射飛鴻翼
獨

上鳳凰臺腸斷栖霞色今君下金陵浮舟訪李白還瞻
故宮闕尋余舊行跡詩題鸚鵡多愁絕景陽側景陽愁
絕日斜曛也應翹首鍾山雲傳道年來仍五色試將消
息隔江聞

雪翁詩集卷五

七言古